

三
國
志
注
補

三國志注補卷二十二

魏志列傳第二十二

今若舉四郡保三江以待其來而爲之內應不

德清胡氏渭禹貢錐指曰巴陵岳州府治本漢下雋縣地荆江口在縣西北洞庭水入江處亦名西江口又名三江口元和志巴陵城對三江口岷江爲西江澧江爲中江湘江爲南江案三江口北岸有楊林浦一名楊葉洲蓋卽水經湘水注所謂巴陵故城西對長洲者

太祖定荊州聞其爲張羨謀也異之辟爲丞相掾主簿遷趙郡太守

御覽卷二百六十二引桓階別傳曰上已平荊州引爲主簿
每有深謀疑事嘗與階籌之或曰昃忘食或夜坐徹旦擢爲
趙郡大守會郡寮乏人上曰北邊未靖以卿威能震敵德足
懷遠故用相煩是亦寇恂河內之舉階在郡時俸盡食醬酢
上聞之數戲之曰卿家醬頗得成否耶詔曰昔子文清儉朝
不謀夕而有脯糧之秩宣子守約簞食魚滄而有加梁之賜
況乎大魏富有四海棟宇之大臣而有蔬食非吾所以禮賢
之意也其賜射鹿師二人并給媒齊人謂麴孽爲媒水經濁
漳水注引長沙耆舊傳偁階爲趙郡太守嘗有遺於路者行
人挂囊粟於樹莫敢取之又御覽卷四百八十五引階別傳
曰階貧儉文帝嘗幸其第見諸子無裨文帝拊手笑曰長者

子無禪乃抱與同乘是日拜二子爲郎使黃門齋衣三十囊
賜曰卿兒能趨可以禪矣

德優且長

且一本作齒

諡曰壯侯子翊嗣

竇宇記卷六十六瀛州高陽縣有聖姑祠邢子勵記云聖姑
姓郝字女君魏青龍二年四月下旬與鄰女采樵於瀛徐二
水合流之處忽有數婦人從水出皆著連腰裙若今之青衣
至女君前曰東海公聘君爲婦故遣相迎因敷連茵褥於水
中置女君茵上青衣者侍側順流而下其家大小皆走往看
唯得涕泣遙望莫能就女君怡然云今幸得爲水仙願勿憂

憶語訖風起遂逝因爲立祠桓翊以大臣子爲尙書郎試高陽長主簿丁馥白縣有聖姑祠前後守令皆謁而後入翊曰何浮言之甚遂立杖而敎曰若祀者有罪未經月餘在廳事忽見十餘婦人各持扇從門入謂翊曰今古旣殊何相妨害而斷吾路翊性方直敎斷更甚未經一旬無病暴卒今水岸上有郝女君招魂葬處時人呼爲元姬冢亦名聖女陵

注遭黨錮隱居荆山遠近宗師之

方輿紀要卷二十三荆山在鳳陽府懷遠縣西南水經注淮水過塗山而後至荆山胡氏曰塗山在鍾離西九十五里荆山在鍾離西八十五里蓋淮流屈曲故道里相懸也

時陶謙病死徐州迎備備欲往羣說備曰袁術尙強今東必與

之爭呂布若襲將軍之後將軍雖得徐州事必無成備遂東與袁術戰布果襲下邳遣兵助術大破備軍備恨不用羣言

何云少章云是時呂布正據兗州與曹操相持何暇復分兵規取徐州乎及布爲操所破乃東奔備已在領徐州之明年至備與袁術戰術誘襲下邳此又在布奔徐州之後一年當時羣止可料袁術之爭徐州不能逆覩呂布之敗也況備雖名領豫州不過屯徐之下邳謙旣卒而備不領州事徐州爲他人所有備亦安得有容足之地哉他日袁呂相爲首尾協領徐州此變生意外初非始謀不滅輕舉貪得致貽顛蹶又何追恨之有斯實由魏史時會虛譚承祚未及刊削今以笞死之法易不殺之刑是重人支體而輕人軀命也

何云陳鴻臚之論原於班固刑法志

時鍾繇與羣議同王朗及議者多以爲未可行太祖深善繇羣言以軍事未罷顧眾議故且寢

晉書刑法志時奉常王脩不同其議魏武帝亦難以藩國改漢朝之制遂寢不行

徙爲尙書制九品人之法羣所建也

御覽卷二百六十五引傅子曰司空陳羣始立九品之制郡置中正評次人才之高下各爲輩目州置都而總其議又引孫楚集奏曰九品漢氏本無班固著漢書序先代賢智以九條此蓋記鬼錄次第耳而陳羣依之以品生人劉毅集論曰職名中正實爲姦府事名九品而有八損宜罷中正除九品

更立一代之制晉書衛瓘傳魏氏承顛覆之運起喪亂之後
人士流移攷詳無地故立九品之制粗具一時選用之本耳
其始造也鄉邑清議不拘爵位褒貶所加足爲勸勵猶有鄉
論餘風中間漸染遂計資定品使天下觀望惟以居位爲貴
人棄德而忽道業爭多少於錐刀之末傷損風俗其弊不細
又李重傳九品始於喪亂軍中之政非經國不刊之法且其
檢防轉碎徵刑失實故朝野之論僉謂驅動風俗爲弊已甚
及踐阼遷尙書僕射加侍中徙尙書令進爵潁鄉侯
水經潁水注潁陰縣故城西魏明帝封司空陳羣爲侯國
且斜谷阻險難以進退轉運必見鈔截多畱兵守要則損戰士
不可不熟慮也帝從羣議

李云若非長文子丹必大喪師諸葛公因而乘之其取關中也必矣惜哉此機

或言欲以避衰

陳絳金罍子曰今俗家人死輒行課算某日魂當還輒棄屍徹哭傾戶走竄謂之躲衰此雖鄙猥絕有所本魏皇女淑薨二宮上下俱東言欲避衰又顏氏家訓亦云偏傍之書死有歸殺子孫逃竄莫肯在家畫瓦書符作諸厭勝喪出之日門前然火戶外列灰祓送家鬼章斷注連凡如此比不近有情之推北齊人魏又在三國則愚督流傳下搖上惑非一日矣衰字通書作煞今俗北方避衰而南方則迎衰也胡三省曰避衰謂五行之氣有王有衰徙舍以避之也今人謂之避灾

煞又以鬼作魃字音所介切

又賊地間之以爲大衰

衰當作哀大哀謂如敝自死也

注臣松之案漢書地理志云元始二年天下戶口最盛汝南郡爲大郡有三十餘萬戶則文景之時不能如是多也案晉太康三年地記晉戶有三百七十七萬吳蜀戶不能居半以此言之魏雖始承喪亂方晉亦當無乃大殊長文之言於是爲過

案於時蔣子通亦有是言不獨長文也又劉昭郡國志補注引帝王世紀云昔漢永和五年南陽戶五十餘萬汝南戶四十餘萬方之於今三帝鼎足不踰二郡加有食祿復除之民凶年飢疾之難見可供役裁若一郡以一郡之人供三帝之

用斯亦勤矣則當時固以戶少爲病也

青龍四年薨諡曰靖侯

寰宇記卷一陳司農墓在陳畱縣北二十八里有碑篆文大司農陳羣墓也一清案羣爲魏司空則三公之官若大司農則卿曹耳樂史誤也

注正始中詔譔羣臣上書以爲名臣奏議朝士乃見羣諫事皆歎息焉

隋書經籍志陳羣集五卷

泰字立伯

世說正始中人士比論以五荀方五陳荀淑方陳實荀靖方陳謚荀爽方陳紀荀彧方陳羣荀覲方陳泰又王右軍目陳

玄伯墨塊有正骨

蜀大將軍姜維率眾依麴山築二城

方輿紀要六十麴城在陝西岷州衛東百里其地名翹上亦曰烏翹蓋翹譌爲麴也一清案下云爲翹爲烏字形相近維果來救出自牛頭山與泰相對

方輿紀要卷六十牛頭山在岷州衛東南魏收志階陵縣有牛頭山又東北卽麴山也

後年雍州刺史王經白泰云姜維夏侯霸欲三道向祁山石營金城求進兵爲翹使涼州軍至枹罕討蜀護軍向祁山

方輿紀要卷五十九祁山在鞏昌府西和縣北七里漢末置城山上爲戍守處石營在縣西北二百里又卷六十金城關

在蘭州北二里當黃河西北山要隘處本漢置闕駟十三州
記金城郡有金城關是也枹罕廢縣今河州治漢屬金城郡
後漢屬隴西狄道故城在今臨洮府治西南漢縣屬隴西故
關卽河關也在洮水西

若維以戰克之威進兵東向據櫟陽積穀之實

櫟陽縣漢屬左馮翊後漢魏省在長安東北維兵方至狄道
安得便可東據櫟陽泰蓋言略陽耳櫟音藥藥略聲近因語
譌而傳寫誤耳

遂進軍度高城嶺潛行夜至狄道東南高山上

方輿紀要卷六十南谷山在渭源縣西二十五里上有高城
嶺卽此

注臣松之案此傳云謂救兵當須眾集而卒聞已至謂有奇變上下震懼此則救至出於不意若不知救至何故伏兵深險乃經三日乎設伏相伺非不知之謂此皆語之不通也

何云少章云維意集眾須時又已設伏深險先事遏截則外救必不能達城可拔耳及秦至神速而又從他道進兵不墮其伏乃若從天而下其懼固宜前後之言本不相礙裴氏摘而論之似未悉兵家之曲折矣一清案少章之論固當然三日設伏之文敘入眾集乃發之下尤爲明曉也

維退還涼州軍從金城南至沃干阪

千字譌于方輿紀要卷六十沃干嶺在蘭州西南舊志云自涼州濟河必度沃干嶺乃至狄道

表上進軍晨夜速到還

何云此處有脫文

明統簡至

世說統作練

注于寶晉紀曰高貴鄉公之殺司馬文王會朝臣謀其故太常
陳泰不至使其舅荀顗召之王待之曲室謂曰立伯卿何以處
我對曰誅賈充以謝天下文王曰爲吾更思其次泰曰泰言惟
有進於此不知其次文王乃不更言

世說注引漢晉春秋曰曹髦之薨司馬昭聞之自投於地曰
天下謂我何於是召百官議其事昭垂涕問陳泰曰何以居
我泰曰公光輔數世功蓋天下謂當並述古人垂美於後一

旦有殺君之事不亦惜乎速斬賈充猶可以自明也昭曰公
間不可得殺也卿更思餘計泰厲聲曰意唯有進於此耳餘
無足委者也歸而自殺何云請誅賈充蓋非實錄玄伯說曹
爽自歸者也使持忠入地咸熙之封不及溫矣

注案陳氏譜羣之後名位遂微謚孫佐官至青州刺史

世說注引陳氏譜謚子忠字孝先州辟不就

帝既踐阼轉署吏部封高陵亭侯遷尚書令

晉書嵇含傳昔魏武每有軍事增置掾屬青龍二年尚書令
陳矯以有軍務亦奏增郎

注次子騫曰主上明聖大人大臣今若不合不過不作公耳

晉書騫傳騫沈厚有智謀封高平郡公元康二年薨年八十

一謚曰武

注魏氏春秋曰矯本劉氏子出嗣舅氏而婚於本族徐宣每非之庭議其闕

晉書劉頌傳頌字子雅廣陵人父觀平陽太守頌嫁女臨淮陳矯矯本劉氏子與頌近親出養於姑改姓陳氏中正劉友譏之頌曰舜後姚虞陳田本同根系而世皆爲婚禮律不禁今與此同義爲婚可也友方欲列上爲陳騫所止故得不劾子本嗣

世說注引世語曰本字休元

帝旣踐阼爲御史中丞賜爵關內侯徙城門校尉

續百官志城門校尉一人比二千石掌雒陽城門十二所

六軍乘舟風浪暴起帝船回側

何云回卽桅也古字通用

今僕射缺宣行掌後事腹心任重莫宜宣者帝遂以宣爲左僕射

續百官志尙書僕射一人六百石注引蔡質漢儀曰僕射主封門掌授廩假錢穀獻帝分置左右僕射

尙方令坐狻見考竟

續百官志尙方令一人六百石掌上手工作御刀劍諸好器物丞一人

臻曰權恃長江未敢亢衡

亢抗古通

明帝卽位進封康鄉侯

水經潁水注東出陽關歷康亭城南魏明帝封衛臻爲康鄉侯此卽臻封邑也方輿紀要卷四十七康城在禹州西北三十里

諸葛亮寇天水臻奏宜遣奇兵入散關絕其糧道乃以臻爲征蜀將軍

水經渭水注成國渠魏尙書左僕射衛臻征蜀所開也一清案西京已有是渠衛公更開治之耳

及殿中監擅收蘭臺令史

宋書百官志魏有殿中侍御史二人蓋是蘭臺遣二御史居殿內察非法也續漢書百官志蘭臺令史六百石掌奏及印

上文書

吳頻歲備兵寇亂邊境而猶案甲養士未果尋致討者誠以百姓疲勞故也

上云吳蜀恃險此不得單舉吳也疑傳寫脫蜀字尋字衍殆卽上文蜀字之譌

注植以老病去位隱居上谷軍都山初平三年卒

後漢書盧植傳植以老病求歸懼不免禍乃詭道從轅轅出卓果使人追之到懷不及遂隱於上谷不交人事冀州牧袁紹請爲軍師初平三年卒方與紀要卷十一軍都山在昌平州西北二十里層巒疊嶂奇險天開太行第八陁曰軍都卽此山也

數日未與夫相見

御覽卷二百六十五未上有皆字

由是爲丞相法曹議令史

續百官志法曹主郵驛科程事令史及御屬二十三人令史
典各曹文書

遂左遷毓使將徙民爲睢陽典農校尉毓心在利民躬自臨視
擇居美田百姓賴之

方輿紀要卷十五磬口山在北直順德府沙河縣西南九十
八里盧毓曰淇陽磬口冶鑄利器漢魏時舊鐵官也今縣有
綦陽鎮置鐵冶司於此蓋卽漢魏之故址隋志謂之磬山
前此諸葛誕鄧颺等馳名譽有四窗八達之誚

窗當作聰見諸葛誕傳注

選舉莫取有名名如畫地作餅不可啖也

下名上宋本增有字

鍾子欽珽咸熙中欽爲尚書

晉書盧欽傳世以儒業顯欽清澹有遠識篤志經史舉孝廉
不行魏大將軍曹爽辟爲掾爽弟嘗有所屬請欽白爽子弟
不宜干犯法度爽深納之而罰其弟除尚書爽誅免官後爲
侍御史襲父爵大利亭侯累遷瑯琊太守宣帝爲太傅辟從
事中郎出爲陽平太守遷淮北都督伏波將軍甚有倆績徵
拜散騎常侍遷吏部尚書進封大梁侯武帝受禪以爲都督
河北諸軍事平南將軍假節入爲尚書僕射加侍中奉車都

三國志卷之二十二
尉卒諡曰元所著詩賦論難數十篇名曰小道

注虞預晉書曰欽少居名位不顧財利清虛澹泊動脩禮典同郡張華家單少孤不爲鄉邑所知唯欽貴異焉

晉書張華傳華字茂先范陽方城人父平魏漁陽太守華少孤貧自牧羊同郡盧欽見而器之鄉人劉放亦奇其才以女妻焉華初未知名箸鵲鵲賦以自寄陳留阮籍見之歎曰王佐之才也由是聲名始著郡守鮮于嗣薦華爲太常博士盧欽言之於文帝轉河南尹丞未拜除佐著作郎遷長史兼中書郎晉受禪拜黃門侍郎中書令惠帝時爲司空封壯武郡公爲趙王倫孫秀所害

注琨及子皓志並至尙書

欽傳志字子道封武彊侯爲劉粲所害一清案晉書陸機傳
范陽盧志於眾中問機曰陸遜陸抗於君近遠機曰如君於
盧毓盧瑱志默然旣起雲謂機曰殊邦遐遠容不相悉何至
於此機曰我父祖名播四海寧不知耶議者以此定二陸優
劣又曰成都王穎與河間王顥起兵討長沙王乂假機後將
軍河北大都督穎左長史盧志心害機寵言於穎曰陸機自
比管樂擬君闇主自古命將遣師未有臣陵其君而可以濟
事者也穎默然然則機之死固由牽秀孟玖亦其恃才傲物
有以自取之也

注永和六年卒於胡胡中

兩胡字衍一

宿松羅忠濟初校

黟縣黃士陵覆校

陽湖吳詡寅再覆校

三國志注補卷二十三

仁和趙一清誤

魏志列傳第二十三

注易墮之意也

一本易作欲漢書注同

太祖定荊州

一本定作奪

不可以一節儉也

何云儉字冊府作論

出爲郎中令

續百官志郎中令一人千石掌王大夫郎中宿衛官如光祿

勳自省少府職皆并焉

所謂悅武無震

何云悅字冊府作玩

禽弟適

三少帝紀及晉書和嶠傳適作適

注嶠同母弟郁素無名嶠輕侮之以此爲損卒於官贈光祿大夫郁以公彊當世致位尚書令

嶠傳嶠以弟郁子濟嗣位至中書郎郁字仲輿才望不及嶠而以清幹稱歷尚書左右僕射中書令尚書令洛陽傾沒奔於苟晞疾卒

注避能江南

能一本作亂

注所歷之國必翔而後集終於豫章時年四十六有子曰混顯名魏世

後漢書許邵傳兄虔亦知名汝南人稱平輿淵有二龍焉寰宇記卷一百六許子將墓在洪州南昌縣南六里雷次宗豫章記云劭就劉繇於曲阿隨繇奔豫章中路疾卒因焚屍柩天紀中太守吳興沈法秀招魂葬劭於此

林宰南和治化有成超遷博陵太守幽州刺史所在有績

續郡國志鉅鹿郡南和御覽卷四百三十一引魏略曰林歷宰守刺史所在檢身節用其家常飢乏糟糠縕敝

注除臨汾令

三國志注卷二十三
漢志河東郡臨汾

注二十二年坐其宗人吉本等起事被收

本當作平見武帝紀

注爲長陵令

漢志長陵屬左馮翊續志無是縣蓋省之也豈魏時復置耶
注肇髡決減死

肇字衍下云刑竟復吏謂並被刑也何與於肇

注苗字德胄鉅鹿人也少清白爲人疾惡建安中入丞相府出
爲壽春令

寰宇記卷百二十九故壽春縣在縣西一里縣前有時苗飲
犢池又卷五十九邢州平鄉縣東北二十里有時苗冢苗鉅

鹿人晉末移葬於此

注定九品以敘人才不能寬

御覽卷二百六十五引魏略作至於敘人才不能寬大

乃扶持老弱詣京密山閒

續郡國志河南戶京密有大騶山有梅山有陁山

太祖除俊曲梁長

續志魏郡曲梁侯國故屬廣平

徙爲征南軍師

續百官志將軍部曲軍司馬一人比千石又有軍假司馬爲副貳其別營領屬爲別部司馬一清案水經注云湍水西有魏征南軍司張詹墓軍司卽軍司馬如東里袁爲于禁軍司

馬杜預行平東將軍領征南軍司是已此征南軍司是魏時特置之官非軍司馬也

後固歷位郡守恂御史縣令

續百官志侍御史十五人六百石注引蔡質漢儀曰出治劇爲刺史二千石平遷補令

注受詔譔皇覽使象領祕書監象從延康元年始譔集數歲成藏於祕府合四十餘部部有數十篇通合八百餘萬事

隋書經籍志皇覽一百二十卷繆卜等譔梁六百八十卷梁又有皇覽一百二十三卷何承天合皇覽五十卷徐爰合皇覽目四卷又有皇覽鈔二十卷梁蕭琛鈔又王象集一卷

曾祖父安祖父根著名前世

後漢書杜根傳安字伯夷根字伯堅

注鄧后怒收根等伏赫

赫一本作誅是也

與王粲和洽並用彊識博聞故太祖游觀出人多得驂乘至其見敬不及洽嘗獨見

何云宋本彊上有粲字嘗上有襲字

出徙洛鄴者八萬餘口

何云先徙八萬餘口蓋知此地之難與蜀爭豫爲之所也

時將軍許攸

通鑑作關中營帥許攸胡三省曰此又一許攸非自袁紹來奔之許攸也

徙襲爲大將軍軍師

軍師之官並見楊俊及趙儼裴潛等傳魏時特置

通曰紹與大將軍相持甚急

將字衍

注臣松之案魏武紀破紹後得許下軍中人書皆焚之若故使人搜閱知其有無則非所以安人情也疑此語爲不然

何云陽焚之而密使人搜閱旣安反側又審情僞操多疑或有是

以儼領章陵太守

續郡國志南陽郡章陵故舂陵世祖更名方輿紀要卷七十九建武十八年使中郎將耿遵築章陵城後嘗爲章陵郡魏

黃初二年更章陵爲安昌縣

護于禁張遼張郃朱靈李典路招馮楷七軍

此于禁所督之七軍也

太祖遣將軍劉柱將二千人

何云人下當從通鑑增往字

儼謂諸將曰舊兵旣少策兵未到

一本策作東

遷平寇將軍徐晃俱前

徐晃時爲平寇將軍遷字誤也

余爲諸軍當之

何云軍字當依通鑑作君

三國志卷之二十三
五
便作地道箭飛書

御覽卷三百二十八引箭上有射字

入爲倉曹屬

續百官志倉曹主倉穀事

在代三年還爲丞相理曹掾

續志及宋志公府掾屬無理曹高柔亦爲理曹掾觀魏武令
是刑法之職

於是太祖深悔還潛之速

何云此魏失并州之故因循至晉遂有劉石之禍由於操方
角逐羣雄不思靖亂亦其規模狹小聽讒忽賢之病

太祖次摩陂歎其軍陳齊整特加賞賜

何云摩陂之役蓋集數州之眾以解二城之圍亦勁矣哉

注文章敘錄曰秀字季彥弘通博濟八歲能屬文遂知名大將軍曹爽辟喪父服終推財與兄弟年二十五遷黃門侍郎爽誅以故吏免

晉書秀傳度遼將軍母邱儉薦於爽曰生而岐嶷長蹈自然玄靜守真性入道與博學彊記無文不該孝友著於鄉黨高聲聞於遠近誠宜彌佐謨明助成鼎味毗贊大府光昭盛化非徒子奇甘羅之疇兼包顏冉游夏之美爽乃辟爲掾

注咸熙中晉文王始建五等命秀典爲制度封廣川侯

秀傳作濟川侯

注泰始七年薨謚元公配食宗廟

三國志卷之二十一
秀傳秀薨其友人料其書記得表草言平吳之事其辭曰孫
皓酷虐不及聖明御世兼弱攻昧使遺子孫將遂不能臣時
有石泰非萬安之勢臣昔雖已屢言未有成旨今既疾篤不
起謹重尸啟願陛下時共施用乃封以上聞詔報曰司空薨
痛悼不能去心又得表章雖在危困不忘王室盡忠憂國省
益傷切當與諸賢共論也

注潛少弟徽字文季

裴秀傳叔父徽有盛名賓客甚眾秀年十歲有詣徽者出則
過秀然秀母賤嫡母宣氏不之禮嘗使進饌於客見者皆爲
之起秀母曰微賤如此當應爲小兒故也宣氏知之後遂止
後魏書曰裴延儁傳魏冀州刺史徽之八世孫上疏曰魏武

英規馬上玩習

注晉諸公贊備憲有清識

憲字景思晉書附秀傳

注嚴幹字公仲李義字孝懿皆馮翊東縣人也

東縣卽臨晉以東之縣也

注建安初關中始開詔分馮翊西數縣爲左內史郡治高陵以東數縣爲本郡治臨晉義於縣分當西屬

長安之爲內史郡實始於秦漢景帝因之分左右內史武帝改三輔曰京兆尹左馮翊右扶風晉書地理志云魏改京兆尹爲太守馮翊扶風各除左右此是禪位後定制如此當關中始開之時分馮翊之西爲左內史東爲本郡其名則同於

漢其實則非也高陵縣秦爲左輔都尉治所漢屬左馮翊三國魏改爲高陵縣屬京兆郡臨晉城在同州朝邑縣西南二里本晉邑秦取其地嘗築壘以臨晉國因名漢屬左馮翊晉爲馮翊郡治蓋承曹魏之制也

注建安中丞相召置軍謀掾

一本置作署

注李推至道張王度主

何校本王改工

宿松羅忠濟初校

黟縣黃士陵覆校

三國志注補卷二十三

陽湖吳翊寅再覆校

三國志注補卷二十四

仁和趙一清譔

魏志列傳第二十四

乃變名姓隱居避亂魯陽山中

續郡國志南陽郡魯陽有魯山

避袁術命召徙居山都之山

方輿紀要卷七十九山都城在襄陽府西北八十里本南陽之赤鄉秦置縣漢屬南陽郡韓暨避袁術居山都山蓋縣境之山也

太祖平荊州辟爲丞相士曹屬

士曹不見於續志疑亦魏武所增置

暨乃因長流爲水排計其利益三倍於前

水經穀水注白超壘在缺門東一十五里壘側舊有塢故冶官所在魏晉之日引穀水爲水冶以經國用遺迹尙有益卽所謂水排也

其以暨爲司徒

前卷注引魏略韓宣傳倂暨爲大鴻臚而本傳不見

注特賜溫明祕器衣一倂五時朝服玉具劔佩

晉書輿服志魏祕書監秦靜曰漢氏承秦改六冕之制但玄冠絳衣而已魏已來名爲五時朝服又有四時朝服又有朝服自皇太子已下隨官受給百官雖服五時朝服據令止給四時朝服闕秋服三年一易

注晉諸公贊曰自暨已下世治素業壽能敦尚家風性尤忠厚
早歷清職惠帝踐阼爲散騎常侍遷守河南尹病卒贈驃騎將
軍壽妻賈充女充無後以壽子謚爲嗣

晉書賈充傳充子黎民死遂無嗣以外孫韓謚爲黎民子奉
充後謚字長深母賈午充少女也父壽字德貞美姿貌善容
止充辟爲司空掾充每譙賓僚其女輒於青瑣中窺之見壽
而悅焉問左右識此人不有一婢說壽姓氏云是故主人女
大感想發於寤寐婢後往壽家具說女意并言其女光麗豔
逸端美絕倫壽聞而心動便令爲通殷勤婢以白女女遂潛
脩音好厚相贈結呼壽夕入壽勁捷過人踰垣而至家中莫
知惟充覺其女悅暢異於常日時西域有貢奇香一著人則

三國志卷之二十一
二
經月不歇帝甚貴之惟以賜充及大司馬陳騫其女密盜以遺壽充寮屬與壽燕處聞其芬馥偁之於充自是充意知女與壽通而其門閭嚴峻不知所由得入乃夜中陽驚有盜因使循牆以觀其變左右白曰無餘異惟東北角如狐狸行處充乃攷問女之左右具以狀對充祕之遂以女妻壽

注少子蔚亦有器望並爲趙王倫所誅韓氏遂滅

充傳壽少弟蔚兄輦令保弟散騎侍郎預吳王友鑒謚母賈午皆伏誅又宗室譙剛王遜傳敬王恬子休之以子文思事怨望將誅執政劉裕親自征之密使遺休之治中韓延之書延之報曰聞親率戎馬遠履西畿閭境士庶莫不恒駭何者莫知師出之名故也辱來疏始委以譙王前事良增歎息司

馬平西體國忠貞款懷待物以君有匡復之勲國家蒙賴推德委誠每事詢仰醺王往以微事見劾猶自遜位況以大過而當默然也但康之前言有所不盡故重使胡道申白所懷道未及反已表奏廢之所不盡者命耳推寄相與正當如此有何不可便及兵戈自義旗以來方伯誰敢不先相諮疇而徑表天子可謂欲加之罪其無辭乎劉裕足下海內之人誰不見足下此心而欲欺誑國士天地所不容在彼不在此矣來言虛懷期物自有由來矣劉藩死於閭閻之門諸葛樊於左右之手甘言詫語方伯襲之以輕兵遂使席上靡款懷之士閭外無自信諸侯以是爲得算良可恥也吾誠鄙劣嘗聞道於君子以平西之至德寧可無授命之臣乎假令天長喪

亂九流渾濁當與賊洪游於地下耳裕得書歎息以示諸佐
曰事應如此延之字顯宗南陽赭陽人魏司徒暨之後也少
以分義偶安帝時爲建威將軍荊州治中轉平西府錄事參
軍以劉裕父名翹字顯宗延之遂字顯宗名兒爲翹以示不
臣劉氏與休之俱奔姚興劉裕入關又奔於魏

注魏名臣奏載安定太守孟達薦雄曰

此別一孟達

注誠不足舒雄智力展其勒幹也

勒一本作勤

遷大鴻臚龜茲王遣侍子來朝朝廷嘉其遠至褒賞其王甚厚
餘國各遣子來朝間使連屬

漢書百官公卿表典客秦官掌諸歸義蠻武帝更名大鴻臚
秩中二千石

牧守州部

部一本作郡

明帝又分林邑封一子列侯正始五年薨謚曰孝侯子述嗣
晉書盧謐傳崔悅字道儒魏司空林曾孫劉琨妻之姪也與
謐俱爲琨司空從事中郎

太祖平袁氏以柔爲管長

漢書地理志濟南郡管應劭曰音姦此管字誤管城自隋開
皇以前未嘗置縣也

咸還皆自勵咸爲佳吏

御覽卷二百六十七咸作成

太祖曰善卽止不殺金母弟蒙活者甚眾

金母弟因此不殺而其後遂寬逃亡之令故云蒙活者甚眾
今云金母弟蒙活者甚眾於事不合或金母弟下有脫文
昔周公作誥傅殷之祖宗咸不顧小人之怨
不顧不與計較也非不顧恤之謂

柔皆請懲虛實

懲字當作徵

注質任之興非防近世

防字當作仿

對曰嘗出錢與同營士焦子文求不得

御覽卷六百三十九求上有久字

以禮爲戒

通鑑作以爲體式

注晉武帝世爲黃沙御史與中丞同

晉書高光傳與上有秩字

後除河閒郡丞稍遷熒陽都尉

水經濟水注滎陽東二十里有故垂隴城世謂之都尉城蓋
滎陽典農都尉治故變垂隴之名矣

歷山陽平原平昌琅邪太守

平昌郡黃初三年魏文帝分城陽郡置治平昌縣今青州安
邱縣西南平昌故城是漢志平原郡有平昌縣續志無益後

漢省而魏復置也

從大司馬曹休征吳於夾石口

夾石當作硤石口字衍

拜禮大將軍長史加散騎常侍

梁書褚球傳自魏孫禮晉荀組以後台佐加貂始有球也

臣受牧伯之任奉聖朝明圖驗地著之界界實以王翁河爲限而鄒以馬丹侯爲驗詐以鳴犢河爲界

兩漢志濟南有著清河有鄒今云平原清河爭界之事又清河郡靈縣下云河水別出爲鳴犢河卽溝洫志所謂靈鳴犢口也

太祖召爲丞相文學掾

丞相文學掾亦魏武置

大將軍曹爽使材官張達斫家屋材

宋書百官志材官將軍一人司馬一人主工匠土木之事漢左右校令其任也魏右校又置材官校尉主天下材木事及諸私用之物觀聞知皆錄奪以沒官少府統三尚方

續百官志中藏府令一人掌中幣帛金銀諸貨物內者令一人掌中布張諸衣物尚方令一人掌上手工御刀劍諸好器物所謂三尚方也

柔保官二十年元老終位比之徐邈常林於茲爲疚矣

何云高柔爲廷尉二十三年此得人久任之方未可因求路難退并致譏也

宿松羅忠濟初校

黟縣黃士陵覆校

陽湖吳翊寅再覆校

三國志注補卷二十五

仁和趙一清譔

魏志列傳第二十五

今因其請救而撫之利莫大焉且四方之寇莫大於河北河北平則六軍盛而天下震

胡三省云觀毗之言非爲譚請救也勸操以取河北也可謂切中其隱

軍還爲丞相長史文帝踐阼遷侍中

御覽卷二百二十七引魏略曰帝嘗大會殿中御史替白筆側階而坐問左右此爲何官何主左右不對辛毗曰爲御史舊持替筆以奏不法今日直備官但珥耳

又欲平北芒令於其上作臺觀則見孟津毗諫曰天地之性高
高下下今而反之既非其理加以損費人功民不堪役且若九
河盈溢河水爲害而邱陵皆夷將何以禦之帝乃止

水經河水注魏氏起玄武觀於芒垂張景陽玄武觀賦所謂
高樓特起竦峙嵒堯直亭亭以孤立延千里之清飈也蓋其
後竟作之傳云帝乃止飾詞耳

注世語曰敞字泰雍官至衛尉毗女憲英適太常泰山羊耽外
孫夏侯湛爲其傳

晉書夏侯湛傳湛字孝若譙國譙人祖威父莊湛幼有盛才
文章宏富御覽卷八百十五引孝若爲憲英傳有曰夫人不
好華麗琇上夫人麗子披緣以錦不肯服從外孫胡毋楊上

夫人錦被夫人反臥之一清案此事晉書列女傳以爲羊祜
注曰憲英聰明有才鑒

晉列女傳作聰朗

阜外兄姜敘屯歷城

方輿紀要卷五十九上祿縣漢置屬武都郡本名歷城其後
改曰建安上祿廢縣在登昌府城縣西百二十里

十七年九月與敘起兵於鹵城

方輿紀要卷五十九鹵城在冀縣西縣之間或曰鹵城卽西
城之譌一清案漢志隴西郡有西縣安定郡有鹵縣續志漢
陽郡西縣故屬隴西而安定無鹵縣蓋後漢省也此當爲安
定之鹵城

三國志卷之二十三
未發轉武都太守郡濱蜀漢阜請依龔遂故事安之而已會劉
備遣張飛馬超等從沮道趣下辯

續郡國志武都郡沮河水出東狼谷此云沮道縣有蠻夷謂
之道或漢末所增

徙郡小槐里

寰宇記卷二十七武功縣小槐里李奇曰卽槐里之西城也
東已有槐里城以此城爲小槐里

阜常見明帝著緇被縹紱半褻袖阜問帝曰此於禮何法服也
帝默然不荅

據宋書五行志著下有縹字衍袖字又晉書輿服志後漢以
來天子之冕前後旒用眞白玉珠魏明帝好婦人飾改以珊

珊瑚

未期而天

宋書禮志作三月而天

特之赤水九日

之赤水九日五字譌刻當作除郎中以顯焉

隆爲散騎常侍

隆上當有徵字

對曰夫災變之法

一本法作發

今案舊史

一本史作占

臣聞西京柏梁旣災越巫陳方建章是經以厭火祥

續五行志注經作營

其後有江充巫蠱也

續五行志注無也字

今興宮室起陵霄闕而鵲巢之此宮室未成身不得居之象也
天意若曰宮室未成將有他姓制御之斯乃上天之戒也

晉書五行志中事在景初元年

昔在伊唐世值陽九厄運之會洪水滔天使鯀治之績用不成
乃舉文命隨山刊木前後歷年二十二載

鯀九載禹十三載乃同合父子共得二十二載與孟子史記
及馬融等諸儒之說不同

今若有人來告權備並脩德政

何云備當作禪

周禮天府掌九伐之則

伐當作賦

以若所爲求若所致

致字當依孟子作欲

臣觀黃初之際天兆其戒異類之鳥育長燕巢口爪胸赤此魏室之大異也

晉書五行志黃初元年未央宮中有燕生鷹口爪俱赤此與商紂宋隱同象景初元年又有燕生巨鷖於衛國李蓋家形若鷹吻似燕高堂隆所指卽此二事其後司馬氏誅曹爽遂

有魏室文明二紀俱不載

隆卒

隋書經籍志魏臺禊祓訪議三卷禊忌歷二卷高堂隆謨又集
六卷梁十卷錄一卷

初太和中中護軍蔣濟上疏曰宜遵古封禪詔曰聞濟斯言使
吾汗出流足事寢歷歲後遂議修之使隆撰其禮儀

宋書禮志蔣濟奏曰夫帝王大禮巡狩爲先昭祖揚福封禪
爲首是以自古革命受符未有不蹈梁父登泰山刊無竟之
名紀天人之際者也故司馬相如謂有文以來七十二君或
從所繇於前謹遺迹於後太史公曰主上有聖明而不宣布
有司之過也然則元功懿德不刊山梁之石無以顯帝王之

功布生民不朽之觀也語曰當君而歎堯舜之美譬猶人子
對厥所生譽他人之父今大魏振前王之弊亂拯流通之艱
危接千載之衰繼百世之廢始自武文至於聖躬所以參成
天地之道網維人神之化上天報應嘉瑞顯祥以比往古其
優衍豐隆無所取喻至於歷世迄今未發大禮雖志在掃盡
殘盜蕩滌餘穢未遑斯事若爾三苗堀彊於江海大舜當廢
東巡之儀徐夷跳梁於淮泗周成當止岱嶽之禮也且昔歲
破吳虜於江漢今茲屠蜀賊於隴右其震蕩內潰在不復淹
就當探其窟穴無累於封禪之事也此儀久廢非倉卒所定
宜下公卿廣纂其禮卜年攷時昭告上帝以副天下之望臣
待罪軍旅不勝大願冒死以聞詔曰聞濟斯言使吾汗出流

足自開闢以來封禪者七十餘君爾故太史公曰雖有受命之君而功有不洽是以中閒曠遠者千有餘年近數百載其儀闕不可得記吾何德之修敢庶茲乎濟豈謂世無管仲以吾有桓公登泰山之志乎吾不敢欺天也濟之所言華則華矣非助我者也公卿侍中尚書常侍省之而已勿復有所議亦不須荅詔也帝雖距濟議而實使高堂隆草封禪之儀以天下未一不欲便行大禮會隆卒故不行

宿松羅忠濟初校

黟縣黃士陵覆校

三國志注補卷二十五

陽湖吳翊寅再覆校

三國志注補卷二十六

仁和趙一清撰

魏志列傳第二十六

太祖召許主者寵知將欲原乃速殺之

胡三省曰主者許縣主吏也

太祖卽日赦出彪

後漢書楊彪傳注引獻帝春秋曰操刑之不愷君之明也楊彪獲罪懼者甚眾

更拜伏波將軍

宋書百官志薊寇將軍僕建安中滿寵居之傳益失之

今夕風甚猛賊必來燒軍

御覽卷三百三十軍作營

寵度其必襲西陽而爲之備

漢志江夏郡西陽方輿紀要卷七十六西陽城在黃州府東南百三十里三國魏爲重地

若入無疆口宜深爲之備

方輿紀要卷二十六無疆口在安慶府桐城縣硖石東南

賊果從無疆口斷夾石

夾當作硖

整軍趨楊宜口

楊陽古通水經決水注陽泉水受決水東北流逕陽泉縣故城東又西北流左入決水謂之陽泉口蓋卽此陽宜口也方

輿紀要卷二十一陽泉城在壽州霍邱縣西北十里漢屬縣六安後漢屬廬江魏爲廬江郡治

尙書趙咨以寵策爲長

此別一趙咨也胡三省曰趙咨蓋必黃初自吳使魏者也文帝重其辨給遂臣於魏竊謂梅磻之說不然

其年權自出欲圍新城以其遠水積二十日不敢下船不敢下船是以舍船上岸爲下船也

明年權自將號十萬至合肥新城

方輿紀要卷二十六新城在廬州府西三十里雞鳴山北故址猶存山在府西四十里肥水出於此括地志云合肥新城距今城三十里或目爲界樓城以在廬壽二州間也

司馬文王弟安陽亭侯幹欲入

晉書宣五王傳幹字子良

偉弟子奮

奮蓋滿炳之子也文選應休璉與滿公琰書琰白昨者不遺
猥見照臨雖昔侯生納顧於夷門毛公受眷於逆旅無以過
也外嘉郎君謙下之德內幸頑才見誠知己歡欣踴躍情有
無量是以奔騁御僕宣命周求陽晝喻於詹何楊倩說於范
武故使鮮魚出於潛淵芳旨發自幽巷繁俎綺錯羽爵飛騰
牙曠高微義渠哀激當此之時仲儒不辭同產之服孟公不
顧尙書之期徒恨晏樂始酬白日傾夕驪駒就駕意不宣展
追惟耿介迄於明發適欲遣書會承來命知諸君子復有漳

渠之會夫漳渠西有伯陽之館北有曠野之望高榭翳朝雲
文禽蔽綠水沙場夷敞清風肅穆是京臺之樂也得無流而
不返乎適有事務須自經營不獲侍坐良增邑邑因白不悉
李善引賈弼之山公表注曰滿寵子炳字公珍爲別部司馬
備涕泣與別曰恨不與君共成大事也

李云不留徐庶田豫此先主之大義盛德

公孫瓚使豫守東州令

東州是東州之誤郡國志河間郡東州故屬勃海方輿紀要
卷十三東州城在河間府東北六十里

鄢陵侯彰征代郡以豫爲相軍次易北

方輿紀要卷十紫荆關在保定易州西八十里山西廣昌縣

東北百里路通宣府大同山谷崎嶇易於控扼卽大行蒲陰
陁也或曰卽古之五原關原一作院水經注謂之子莊關曹
彰蓋由此關進兵

乃使豫持節護烏丸校尉

續百官志護烏桓校尉一人比二千石

胡見煙火不絕以爲尙在去行數十里乃知之追豫到馬城

漢志代郡馬城方輿紀要卷四十四馬城在山西大同府東
北境十三州志馬城在高柳東二百四十里一清案牽招傳
作故馬邑城城在今朔州東北漢馬邑縣屬雁門郡二傳未
知誰是

豫度賊船垂還歲晚風急必畏漂浪東隨無岸當赴成山

召淮署爲門下賊曹轉爲丞相兵曹議令史

續百官志賊曹主盜賊事兵曹主兵事令史又曹掾之屬也
旣陣備疑不渡

御覽卷二百八十五引汲上有敢字

又破隴西名羌唐驪於枹軍加建威將軍

何云後主建興八年當魏太和四年魏延大破郭淮於陽谿
事見延傳而此諱之又刀劍錄淮於太原得一刀文曰宜爲
將後遂爲將軍及與蜀將戰敗失此刀

青龍二年諸葛亮出斜谷並田於蘭坑

水經漾水注建安川水東與蘭坑水會水出西南近溪東北
逕蘭坑城西東北流注建安水建安水又東逕蘭坑城北建

安城南其地故西縣之歷城去仇池百二十里後改爲建安城一清案建安城在成縣西則蘭坑城亦宜在其處

蜀兵大至淮逆擊之

何云宋本擊下有走字

淮奏請使居安定之高平

方輿紀要卷五十八鎮原縣漢置高平縣爲安定郡治後漢屬安定郡有城曰第一城其城險固故曰第一也

九年遮塞等屯河關白土故城

水經河水注左南津西六十里有白土城城在大河之北而爲緣河濟渡之處魏涼州刺史郭淮破羌遮塞於白土卽此處矣據此則淮曾爲涼州刺史蓋傳失之方輿紀要卷六十

河關城在蘭州西南漢縣屬金城郡後漢屬隴西又卷六十
四白土城在西寧衛南晉置白土縣屬金城郡或云縣本曹
魏所置

姜維出石營從疆川乃西迎治無戴畱陰平太守廖化於成重
山築城

水經漾水注白水又東逕郭公城南昔郭淮攻廖化於陰平
築之故因名焉一清案陝西階州文縣古氐羌地漢武開西
南夷置陰平道屬廣漢郡北部都尉治焉蜀建興七年取魏
陰平魏亦遙置其郡屬雍州蜀亡始合爲一屬秦州而四川
龍安府東百五十里有陰平城宋白曰文州爲古陰平魏晉
之陰平郡及陰平縣治也大寶末蕭紀將楊乾運攻氐楊

法琛拔劍閣進據南陰平對古陰平而言因謂爲南陰平文縣南至龍安府三百三十里此魏蜀分置之蹟略有可攷者是歲與雍州刺史陳泰協策降蜀牙門將句安等於邈上

晉書文帝紀蜀將姜維寇隴右郭淮攻維別將句安於麴人而不決帝乃進據長城南趣駱谷以疑之維懼退保南鄭安軍絕援帥眾來降

鎮子奕字泰業山濤啟事稱奕高簡有雅量歷位雍州刺史尙書

晉書奕傳奕字大業初爲野王令羊祜過之奕歎曰羊叔子何必減郭大業少還復往又歎曰羊叔子去人遠矣遂送祜出界數百里坐此免官奕有重名當世朝臣皆出其下太康

八年卒賜諡曰簡又魏書郭祚傳淮弟亮之後從高祖南巡
車駕幸長安行經渭橋過郭淮廟問祚曰是卿祖也祚曰是
臣七世伯祖高祖曰先賢後哲頓在一門

宿松羅忠濟初校

黟縣黃士陵覆校

陽湖吳翊寅再覆校

三國志注補卷二十七

仁和趙一清撰

魏志列傳第二十七

校事趙達問以曹事邈曰中聖人達白之太祖太祖甚怒渡遼將軍鮮于輔進曰平日醉客謂酒清者爲聖人濁者爲賢人邈性修慎偶醉言耳

左傳襄二十二年臧武仲如晉雨過御叔御叔在其邑將飲酒曰焉用聖人我將飲酒而已兩行何以聖爲此卽景山之所謂中聖人也鮮于輔武人不得其說更以清濁分聖賢耳文帝踐阼歷譙相平陽安平太守潁川典農中郎將

御覽卷二百四十一引魏略曰上以農殖大事將選典農以

徐邈爲潁川典農中郎將所在箸稱

以邈爲涼州刺史使持節領護羌校尉

續百官志護羌校尉一人比二千石

河右少雨常苦乏穀邈上脩武威酒泉鹽池以收虜穀

漢書地理志金城郡臨羌注云西北至塞外有西王母石室
偃海鹽池莽曰鹽羌蓋地與武威酒泉二郡相連也

乃支度州界軍用之餘以市金帛犬馬

晉書食貨志作及度支州界軍用之餘以市金錦犬馬

盧欽箸書稱邈曰徐公志高行潔才博氣猛

御覽卷七百五十引魏氏春秋曰徐邈善畫作走水獺標於
水濱羣獺集焉又引續齊諧記曰魏明帝遊洛水水中有白

獺摩淨可憐見人輒去帝顧玩終不可得景山曰臣聞獺嗜
鯢魚乃不避死可以此候之乃畫板作兩生鯢魚懸岸於是
羣獺競赴一時執得帝嘉之謂曰不聞卿知畫何其妙也荅
曰臣亦未嘗執筆人之所作者自可庶幾耳帝曰是善用所
長者也

注虞預晉書曰

隋書經籍志晉書二十六卷本四十四卷訖明帝今殘缺晉
散騎常侍虞預撰

時同郡劉公榮

晉書王戎傳兖州刺史劉昶字公榮名知人嘗造周周謂曰
卿有知人之明欲使三兒見卿卿爲目高下以效郭許之聽

可乎公榮乃自詣該兄弟與共言語觀其舉動出語周曰君三子皆國士也元夏器量最優有輔佐之風展力仕宦可爲亞公叔夏季夏不減常伯納言也該少出仕宦歷職內外泰始初爲吏部尙書遷左僕射右光祿大夫開府儀同三司卒於官該以在魏已爲大臣本非佐命之數懷遜讓不得已而居位故在官職無所荷任夙夜思恭而已終始全潔當世以爲美談詔歷二官吏部郎山濤啟事稱詔清白有誠終於散騎常侍茂至侍中尙書潁川荀愷宣帝外孫世祖姑子自負貴戚要與茂交茂拒而不荅由是見怒元康元年楊駿被誅愷時爲尙書僕射以茂駿之姨弟陷爲駿黨遂枉見殺眾咸冤痛之

諡曰貞侯子威嗣

晉書良吏傳威一名貌

告歸臨辭質賜其絹一匹爲道路糧威跪曰大人清白不審於何得此絹質曰是吾俸祿之餘故以爲汝糧耳威受之

史通暗惑篇云古人謂方牧爲二千石以其祿有二千石故也名以定體貴實甚焉設使廉如伯夷介若黔敖苟居此職終不患於貧餒者如胡威之別其父也一縑之財猶且發問則千石之俸其費安施料以耳籌推之借箸察其厚薄知不然矣

官至前將軍青州刺史太康元年卒追贈鎮東將軍

御覽卷二百四十引晉武帝起居注曰豫州刺史胡威忠素

質直思謀深奧其以威爲監軍刺史如故晉書良吏傳威證
曰烈

戚弟黹字季象

晉書良吏傳黹仕至益州刺史安東將軍

少與同郡王淩俱知名淩年長昶兄事之

何云觀此同爲太原之王而晉陽與祁非一族

故兄子默字處靜

晉書王嶠傳嶠祖默魏尙書

潁川郭伯益好尙通達敏而有知其爲人弘曠不足輕貴有餘
得其人重之如山不得其人忽之如草吾以所知親之昵之不
願兒子爲之

姜云士有跖弛而大節可觀有拘謹而名誼無取卽如郭奕劉楨何遽不如徐幹任嘏而槩劣之豈爲公論玩此一篇直是父敎子諂耳又云卬邱諸葛舉兵以清君側而昶力效馳驅終成晉篡其後王沈洩高貴鄉公之謀未必不由其家學也

昭先名嘏別傳曰嘏樂安博昌人世爲簪姓夙智早成

何氏從宋本早作性

故鄉人爲之語曰蔣氏翁任氏童

隋書經籍志任子道論十卷任嘏撰一清案王坦之令伏滔習鑿齒論青楚人物滔以任昭先與伏高陽連類並稱伏高陽未詳其人也

父旌

一本旌作旄

選征南將軍

選乃遷之譌

今屯苑去襄陽三百餘里

何氏校苑作宛

昶陳治略五事

姜云昶陳五事全無高堂城翰之慮而迂緩塞責每讀西漢
晚年孔光張禹上書爲之氣盡此其類也

其二欲用考試考試猶準繩也

御覽卷二百十二引王昶考課事曰尙書侍中考課一日掌

運六材以考官人二曰綜理萬機以考庶績三曰進視惟允
以考讜言四曰出納王命以考典政五曰明罰敕法以考典
刑

賊大將施續夜遁入江陵城追斬數百級

方輿紀要卷七十八江陵以水爲險孫吳時引諸湖及沮漳
水浸江陵以北地以拒魏兵號爲北海

甘露四年薨

隋書經籍志昶集五卷梁有錄一卷

案晉書渾自越騎入晉累居方任平吳有功封一子江陵侯位
至司徒

晉書渾傳渾字玄冲平定秣陵進爵爲公封子澄爲亭侯弟

湛爲關內侯元康七年薨年七十五諡曰元又列女傳渾妻
鍾氏字珍魏太傅繇曾孫父徽黃門郎一清案鍾會傳云會
兄子邕隨會與俱死會所養兄子毅及峻迥等當伏誅詔特
原峻迥兄弟唯毅及邕息伏法然則徽不知誰之子也

王基字伯興

後漢書鄭玄傳注作伯興

散騎常侍王肅著諸經傳解及論定朝儀改易鄭玄舊說而基
據持立義常與抗衡

基爲鄭玄門人故持立義隋書經籍志毛詩駁一卷梁五卷
新書五卷東萊耆舊傳一卷並王基撰

大將軍曹爽請爲從事中郎出爲安豐太守

方輿紀要卷二十一 安豐漢縣魏置安豐郡治安風今壽州
霍邱縣西南二十里有安風城而安豐城在壽州西南六十
里西去霍邱縣九十里

吳嘗大發眾集建業揚聲欲入攻

攻字通鑑作寇

此不過欲補定支黨還自保護耳

通鑑定作從

基又表城上昶

句疑有脫誤

許允傳嘏袁侃崔贊皆一時正士有直質而無流心可與同政
事者也

姜云此輩皆典午之腹心而曹宗之姦賊惑世亂民惟此爲甚史家誇大而不裁之大義則皆邪說害民者也

基屢請乃聽進據潁水

方輿紀要卷四十七潁水在陳州商水縣北亦曰大潁水自許州鄆城縣流入境至縣東二十里而合潁水上有潁橋潁卽潏也

兵間拙速未覩工遲之久

工遲下有缺文

會吳遣朱異來救誕軍於安城基又被詔引諸軍轉據北山

吳志孫綝傳云朱異帥三萬人屯安豐城爲文欽勢安城在壽州南安豐城在壽州西南兩城相近故二傳各書之方輿

紀要卷二十一 八公山一名肥陵山亦謂之北山在壽州東北五里

武皇帝克袁紹於官渡自以所獲已多不復追奔懼挫威也何云魏不能一天下坐新得荊州乘勝輒進有烏林之敗耳基此論千古持勝之要未有能易之者也

是歲基母卒詔秘其凶問迎基父豹喪合葬洛陽追贈豹北海太守

據此則基竟不持母服矣異哉

甘露四年轉爲征南將軍都督荊州諸軍事

晉書文帝紀分荊州置二都督基鎮新野州秦鎮襄陽

詔征南將軍王基部分諸軍使烈督萬人徑造沮水荊州義陽

方輿紀要卷五十義陽城在汝寧府信陽州南四十里漢南陽郡平氏縣之義陽鄉也魏文帝置義陽縣屬義陽郡

又曰夷陵東道當由車御至赤岸乃得渡沮

赤岸卽赤谿也方輿紀要卷七十八赤谿在荊州府夷陵州西北五里卽陸抗築城圍步闡處東合大江或謂之東坑陸機辨亡論陸公以偏師三萬北據東坑李善曰東坑在西陵步闡城東北長十餘里抗所築城在東坑上

西道當出箭谿口乃趣平土皆山險狹

何云冊府山下有路字

昔子午之役兵行數百里而值淋雨橋閣破壞後糧腐敗前軍縣之

何云宋本淋雨作霖而縣之作縣乏

是歲基薨追贈司空

御覽卷五百四十一引魏氏春秋曰司空東萊王基當世大儒豈不達禮而納司空王沈女以姓同源異故也一清案此劉聰大鴻臚劉弘之辭見晉書載記

咸熙中開建五等以基著勳前朝改封基孫廕而以東武餘邑賜一子爵闕內侯

御覽卷二百十五引晉太康起居注曰故司空王基夙爲先帝授任基子沖尙書郎中雖在清途猶未免楚撻其以沖爲治書侍御史

評曰徐邈清尙弘通胡質素業貞粹王昶開濟識度王基學行

堅白皆掌統方任垂稱著績可謂國之良臣時之彥士矣
姜云徐邈胡質盡忠曹氏猶爲不可若昶基之翰誠司馬鋤
害忠貞而評云開濟識度學行堅白可謂顛倒是非之極者
矣一清寧王基非惟不忠亦且不幸

宿松羅忠濟初校

黟縣黃士陵覆校

陽湖吳嗣寅再覆校

三國志注補卷二十八

仁和趙一清撰

魏志列傳第二十八

叔父允爲漢司徒誅董卓卓將李傕郭汜等爲卓報仇入長安殺允盡害其家凌及兄晨時年皆少踰城得脫亡命歸鄉里

宋書王元謨傳六世祖宏河東太守綿竹侯以從叔司徒允之難棄官北居新興仍爲新興雁門太守又王懿傳自言漢司徒允弟幽州刺史懋七世孫

加建武將軍轉在青州

在當作任

休得免難仍徙爲揚豫州刺史

案文多揚字是時諸葛誕爲揚州刺史誕傳曰出爲揚州刺史王淩之陰謀也司馬宣王東伐以誕爲鎮東將軍都督揚州諸軍事以是知淩不兼領二州也蓋都督或兼二州如王昶都督荆豫諸軍事王基都督揚豫諸軍事也若刺史則無兼領二州之例

二年吳大將全琮數萬眾寇芍陂

水經肥水注東北逕白芍亭東積而爲湖謂之芍陂周一百二十許里在壽春縣南八十里言楚相孫叔敖所造魏王淩與吳將張休大戰於芍陂卽此處也

是時淩外甥令狐愚以才能爲兗州刺史屯平阿

方輿紀要卷二十一平阿城在鳳陽府懷遠縣北三十里漢

縣屬沛郡後漢屬九江郡

二年樊惑守南斗

吳志宋書天文志災見於吳赤烏十三年五月及七月也

三年春吳賊塞涂水

涂水卽滁水唐六典淮南道大川曰滁肥吳志赤烏十三年遣軍十萬作堂邑涂塘以掩北道卽此事也

宣王將中軍乘水道討凌

晉書宣帝紀帝自帥中軍汎舟沿流九日而到甘城何云此中軍猶言禁軍不及徵調外軍故以中軍進也

又將尙書廣東使爲書喻凌大軍掩至百尺

水經渠水注沙水東南流注於潁謂之交口水次有大堰卽

古百尺堰也魏書國志曰司馬宣王討王淩大軍掩至百尺堰卽此堰也

軍到邱頭

水經潁水注邱頭南枕水魏書郡國志曰宣王軍次邱頭王淩面縛水次故號武邱矣一清案司馬懿雖嘗討淩至邱頭而武邱之名至司馬昭克諸葛誕始改見晉書文帝紀本注誤耳

其年八月太傅有疾夢淩達爲痛甚惡之遂薨

顏之推還冤記宣王有疾白日見淩來并賁達爲祟因呼字曰彥雲緩我宣王身亦有打處少日遂薨

燒其印綬朝服親土埋之

晉書王敦傳郗鑒曰王淩視土親字誤也

干寶晉紀曰兗州武吏東平馬隆託爲愚家客以私財更殯葬行服三年種植松柏一州之士愧之

晉書馬隆傳隆字孝興東平陸人少而智勇好立名節太熙初封奉高縣侯

魏氏春秋曰廣字公淵弟飛臬金虎並才武過人

世說王公淵娶諸葛誕女入室言語始交王謂婦曰新婦顏色卑下殊不似公休婦曰大丈夫不能彷彿彥雲而令婦人比蹤英傑劉峻注引魏氏春秋曰廣有風量才學名重當世與傅嘏等論才性同異行於世劉峻注云王廣名士豈以妻父爲戲此言非也

太傅嘗從容問蔣濟濟曰凌文武俱贍當今無雙廣等志力有美於父耳退而悔之告所親曰吾此言滅人門宗矣

何云此言後人所增飾若曹爽執權時濟無緣有此既七族同夷濟以恨其失信發病死矣

母邱儉字仲恭

何云漢書高帝紀注云曼邱母邱本一姓也語有緩急耳故知此字作母者傳寫之誤史通中音貫是也

河東聞喜人也父興

水經穀水注穀水東逕魏將作大匠母邱興盛墓南二碑並存儉父也管輅過其墓而歎謂法應滅族輅本傳云過儉墓誤矣又儉父名興盛此云興亦不同蘇則傳亦單名興

尋率精兵蹙脅張掖濟拔領太守杜通西海太守張陸張掖番和驪軒二縣吏民

番和漢縣屬張掖郡番音盤驪軒李奇音遲虔師古曰今其俗人呼驪軒疾言之曰力虔

句驪王宮將步騎二萬人進軍沸流水上

方輿紀要卷三十八沸流江在朝鮮江東郡南自漢江分流西合於大同江

大戢梁口

梁音渴

梁口冊府元龜作渴口注云渴音過是也此並譌水經濡水注新河又東至九過口枝分南注海卽是此地

儉遂東馬縣車以登丸都屠句驪所都斬獲首虜以千數

寰宇記卷百七十三儉追至潁峴縣車束馬登丸都山屠其所都斬首萬餘級方輿紀要卷三十八丸都城在沸流水之東

過沃沮千有餘里至肅慎氏南界刻石紀功刊丸都之山銘不耐之城諸所誅納八千餘口

本志則丸都城高句麗所居也不耐城則東沃沮所居也而高句麗於東界築城曰置溝婁北沃沮所居置字誤當作買與諸所記不同儉蓋往征高句麗至東沃沮又追至北沃沮而止方輿紀要卷三十八沃沮有二一曰東沃沮在葢馬大山之東亦曰南沃沮一曰北沃沮後漢東夷傳買溝婁北沃沮之地去南沃沮八百餘里高麗中爲溝婁杜佑曰北沃

沮一名買溝婁高句麗漢初爲縣屬元菟郡賜以衣幘朝服鼓吹常從郡受之後不復詣郡但於東界築小城受之遂名此城爲幘溝婁後譌爲買溝不而城漢縣屬樂浪郡後漢廢而耐通

吳太傅諸葛恪圍合肥新城儉與文欽禦之太尉司馬孚督中軍東解圍恪退還

晉書景帝紀嘉平五年夏五月諸葛恪圍新城朝議慮其分兵以寇淮泗欲戍諸水口帝曰諸葛恪新得政於吳欲徼一時之利并兵合肥以冀萬一不暇復爲青徐患也且水口非一多戍則用兵眾少戍則不足以禦寇恪果并力合肥卒如所度帝使鎮東將軍卞卬儉揚州刺史文欽等距之儉欽請

戰帝曰恪卷甲深入投兵死地其鋒未易當且新城小而固攻之未可拔遂命諸將高壘以禦之相持數月恪攻城力屈死傷大半帝乃敕欽督銳卒趨合榆要其歸路儉帥諸將以爲後繼恪懼而遁欽逆擊大破之斬首萬級

別使諸葛誕督豫州諸軍從安風津擬壽春

方輿紀要卷二十一安風城在壽州霍邱縣西南二十里前漢書地理志屬六安後漢書郡國志屬廬江魏置安豐郡治安風縣津蓋以縣得名又縣西南十里有豐水本名窮水水經注窮水出安豐縣窮谷津當在水上

征東將軍胡遵督青徐諸軍出於譙宋之間絕其歸路大將軍屯汝陽使監軍王基督前鋒諸軍據南頓以待之令諸軍皆堅

安靈山上

水經穀水注阜澗水出新安縣東南流逕卬邱興盛墓東靈山當在其境旬時蓋還守祖墓也

欽降吳表曰稟命不幸常隸魏國雨絕於天雖側伏隔都自知無路司馬師滔天作逆廢害二主

何云此表後人僞作高貴鄉公之弒昭事也何得預言二主平

謹上還所受魏使持節前將軍山桑侯印綬

水經陰溝水注山桑邑俗謂之北平城文欽封山桑侯疑食邑於此

王凌奏欽貪殘不宜撫邊求免官治罪由是徵欽還曹爽以欽

鄉里厚養待之不治欽事

御覽卷八百七十一引魏略文欽爲廬江太守爲都督王淩所奏欽訴曹爽謂曰凌責卿載灰兩船何用爲乎日間足下起染舍故燒作灰耳

諸葛誕字公休琅邪陽都人諸葛豐後也

御覽卷十三引曹嘉之晉紀誕以氣邁稱嘗倚柱讀書霹靂震其柱誕自若

世語曰是時當世俊士散騎常侍夏侯玄尙書諸葛誕鄧颺之徒共相題表以元疇四人爲四聰誕備八人爲八達中書監劉放子熙

何氏從宋本疇字作等備字作輩

後母邱儉文欽反遣使詣誕招呼豫州士民誕斬其使露布天下令知儉欽凶逆

姜云諸葛誕以見疑謀叛其死宜矣若果忠於魏室則不首發儉欽之謀坐成司馬之勢魏之忠臣唯母邱仲恭一人而已王彥雲事迹猶在影響之間

甘露元年冬吳賊欲向徐場

徐場卽涂塘也

二年五月徵爲司空誕被詔書愈恐遂反召會諸將自出攻場州刺史樂綝殺之

御覽卷三百六十七引魏末傳曰誕殺綝有典農都尉數說誕於是收而斬之罵曰卿坐舌先人以竹攪其舌然後殺之

魏末傳曰賈充與誕相見談說時事因謂誕曰洛中諸賢皆願禪代君所知也君以爲云何

何云昭初代兄秉政未有恩威及人安得卽言禪代之事蓋哀誕之志甚充之惡者爲之也

世語曰黃初末吳人發長沙王吳芮冢以其塋於臨湘爲孫堅立廟

何云立廟何事而發死者之塋乎世語之鄙淺不足信如此吳人大喜遣將全懌全端唐咨王祚等率三萬取密與文欽俱來應誕

晉書文帝紀吳使文欽唐咨全端全懌等三萬餘人來救誕諸將逆擊不能禦將軍李廣臨敵不進泰山太守常時稱疾

不出並斬之以徇

吳將朱異再以大眾來迎誕等渡黎漿水

水經肥水注芍陂瀆又北分爲二水一水東注黎漿水東逕黎漿亭南

孫琳以異戰不進怒而殺之城申食轉少外救不至眾無所恃
晉書文帝紀吳人殺異帝曰異不得至壽春非其罪也而吳
人殺之適以謝壽春而堅誕意使其猶望救耳若其不爾彼
當突圍決一旦之命或謂大軍不能久省食減口冀有他變
料賊之情不出此三者今當多方以亂之備其越逸此勝計
也因命合圍分遣羸疾就穀淮北廩軍士大豆人三升欽聞
之果喜帝愈羸形以示之多縱反間揚言吳救方至誕等益

寬恣食俄而城中乏糧

圍上諸軍臨高以發石車火箭逆燒破其攻具

御覽卷三百三十六引王隱晉書曰諸葛誕反淮南孟康王
募曰宜作土山斂諸侯材板作櫓以爲攻具

欽子騫及虎將兵在小城中

方輿紀要卷二十一壽春有二城一曰金城壽陽中城也又
州東一里有諸葛城相傳諸葛誕所築

唐咨王祚及諸裨將皆面縛降

晉書文帝紀吳將唐咨孫曼孫彌徐紹等帥其屬皆降而鍾
會傳曰孫靜從子嗣緝則與晉書不同吳宗室又無嗣緝其
人者曼與彌皆孫靜次子瑜之子又不得爲從子也孫皓之

立司馬昭遣降將徐紹孫或齎書喻皓而諸記傳又無孫或
其差錯如此

及大軍之攻亢旱踰月城旣陷是日大雨圍壘皆毀

宋五行志謂之天亡踰月當依宋志作踰年何云外圍旣合
士眾猥多資糧方竭誕不盡人謀則天棄之矣誕能合虛譽
養死士實中情恒怯無遠略者也假使舉淮南之眾直趨洛
陽投命勤王司馬昭徵調未集勝負誠未可知耳

誕子覲字仲思吳平還晉覲子恢字道明位至尙書令追贈左
光祿大夫開府

晉書諸葛恢傳覲奔吳爲大司馬吳平逃竄不出武帝與覲
有舊姊又爲瑯琊王妃帝知覲在姊間因就見焉覲逃於廁

帝又逼見之謂曰不圖今日復得相見覲流涕曰不能漆身
皮面復覲聖顏詔以爲侍中固辭不拜歸於鄉里終身不向
朝廷而坐世說曰諸葛靚在吳於朝堂大會孫皓問卿字仲
思爲何所思對曰在家思孝事君思忠朋友思信如斯而已
又注引晉諸公贊曰靚以至孝發名時稽康亦被法而康子
紹死蕩陰之役談者咸曰觀紹靚二人然後知忠孝之道區
以別矣御覽卷三百六十三引晉中興書曰諸葛恢弱冠知
名避地江左於時潁川荀顗字道明陳畱蔡謨字道明俱有
名譽號中興三明時人爲之歌曰京都三明各有名蔡氏儒
雅荀葛清

君子謂司馬大將軍於是役也可謂能以德懷矣

懷一本作攻

夫建業者異矣各有所尙

通鑑作異道

喪王基之功

喪字通鑑作賞

武昭旣敷

何云昭字似當作略

太祖破荊州徙汝南爲農民養蠶

晉書段灼理艾疏曰艾本屯田掌蠶人

年十二隨母至潁川讀故太丘長陳寔碑文

古今刀劍錄曰鄧艾年十二曾讀陳太邱碑碑下掘得一刀

黑如漆長三尺餘刀上常有氣淒淒然時人以爲神物
後爲典農綱紀

綱紀卽注引世語功曹也典農之官詳此傳注

武帝監軍郭誕元奕之子

郭嘉潁川陽翟人子奕字伯益此云武帝監軍郭誕元奕之
子不可曉也

建安中少府吉本起兵詣都

本字依武帝紀當作平

元信坐被刑在家從典農司馬求人御以艾苞與御行十餘里
與語悅之謂二人皆當遠至爲佐相

晉書石苞傳縣召爲吏給農司馬會謁者陽翟郭元信奉使

求入爲御司馬以苞及鄧艾給之行十餘里元信謂二人曰子後並當至卿相苞曰御隸也何卿相乎古人字似入字當依石苞傳作求入爲御佐相亦當依晉書卿相爲得

艾以爲田良水少不足以盡地利宜開河渠可以引水澆溉大積軍糧又通運漕之道

寰宇記卷十漑灌城在陳州商水縣東北二十里隋圖經云鄧艾所築西華縣西二十里有柳城故老傳云女媧氏之都本名媧城鄧艾營稻陂時柳舒爲陂長後人因名爲柳城又卷二十四陂在蔡州西平縣界並鄧艾所置磚城在潁州沈邱縣東北四十五里司馬宣王使鄧艾於此置屯種稻以備東南築城圍倉廩

宣王善之事皆施行

事皆施行御覽卷三百三十三引志作皆如艾計下云遂北臨淮水自鍾離而南橫石以西盡泚水四百餘里五里置一營營六十八且田且守兼脩廣淮陽百二渠上引河流下通淮潁大理諸陂於潁南潁北穿渠三百餘里溉田二萬頃淮南淮北皆相連接自壽春到京師農官兵屯雞犬之聲阡陌相屬下接每東南有事數語冊府引此亦云鄧艾傳則是承祚本書後人失之所當刊正補入無疑也並見晉書食貨志又晉書宣帝紀正始三年三月奏廣漕渠引河入汴溉東南諸陂始大佃於淮北四年九月帝以滅賊之要在於積穀乃大興屯守開廣淮陽百二渠又脩諸陂於潁之南北萬

餘頃自是淮北倉庾相望壽陽至京師農官屯兵連屬焉水
經渠水注沙水又南與廣漕渠合上承龐官陂云鄧艾所開
也

正始二年

宣帝紀作三年

每東南有事大軍興

當作大興軍眾御覽作大軍出征

於是畱艾屯白水北

寰宇記卷十六鄧艾廟在白水陂上去泗州臨淮縣南一百
二十里艾於此置屯田四十九所其陂東西長三十五里去
縣一百里方輿紀要卷三十二高郵州寶應縣西八十五里

有白水塘闊三十里周二百五十里亦曰白水陂鄧艾所作
與盱眙破釜塘相連開八水門立屯溉田萬二千頃

遷汝南太守

方輿紀要卷二十一博城在鳳陽潁州東北四十里鄧艾於
此屯田以備東南蓋倉城也寰宇記卷十一蔡州西平縣界
有二十四陂魏典農鄧艾所置也

恪歸果見誅

李光地云料恪之審與蜀人張達同何云觀艾之料恪則知
王基之忠於司馬昭所謂撫恤上下以立根基者至言要略
也曹爽固豚犢終於必敗然不興駱谷之役則民怨未起

遷兗州刺史

水經河水注鄧城縣故城在河南一十八里王莽之鄧良也
沅州舊治魏武創業始自於此河上之邑城南有魏使持節
征西將軍太尉方城侯鄧艾廟廟南有艾碑秦建元十二年
廣武將軍沅州刺史關內侯安定彭超立
艾以與賊勢相遠非要害之地輒移屯附亭
附亭卽黎漿亭也附近也移屯近此亭也

彼以船行吾以陸軍

何氏校改軍作運

頃之維果向祁山聞艾已有備乃回從董亭趣南安艾據武城
山以相持維與艾爭險不克其夜渡渭東行緣山趣上邽艾與
戰於段谷大破之

水經渭水注涇谷水又東北歷董亭下方輿紀要卷五十九
董亭在鞏昌府西南董或作童武城山在府東南段谷水在
秦州西南水經注上邽南有段溪水出西南馬門溪

二年拒姜維於長城

水經渭水注洛谷水出南山洛谷北流逕長城西魏甘露三
年蜀遣姜維出洛谷圍長城卽斯地也

四年秋詔諸軍征蜀大將軍司馬文王皆指授節度使艾與維
相綴連

晉書文帝紀帝將伐蜀征西將軍鄧艾以爲未有覺屢陳異
議帝患之使主簿師纂爲艾司馬以喻艾乃奉命

維聞鍾會諸軍已入漢中引退還欣等追躡於疆川口大戰維

敗走聞雍州已塞道屯橋頭從孔函谷入北道欲出雍州後諸葛緒聞之卻還三十里維入北道三十餘里聞緒軍卻尋還從橋頭過緒趣截維較一日不及

水經漾水注關駟曰強水出陰平西北強山一曰強川鄧艾遣王頎敗姜維於強川卽是水也又白水東北逕橋頭方輿紀要卷五十九孔函谷在鞏昌府階州文縣西北又云司馬昭遣諸葛緒自祁山趨武街橋頭絕維歸路維還聞緒已塞橋頭乃佯出北道緒引卻維從橋頭達陰平讀書鏡云史不言武街趨橋頭或以武街爲同谷橋頭亦在焉誤矣蓋昭使緒出逕道由祁山至武街卽從武街西南走橋頭也時鍾會已入漢中鄧艾方戰涪川橋頭爲東西要會維還必由陰平

三國志卷之二十一
入蜀故司馬昭遺緒軍此緒不知兵鄧艾追維東還至此卽
定入蜀之謀矣

維遂東引還守劔閣鍾會攻維未能克艾上言今賊摧折宜遂
乘之從陰平由邪徑經漢德陽亭趨涪出劔閣西百里

方輿紀要卷六十八漢陽山在劔州北二里峰巒高峻亦謂
之北山或謂之故壘山有姜維拒鍾會故壘又卷六十七白
馬關在綿州羅江縣西十五里與德陽縣鹿頭關相對山至
險峻有小徑僅容車馬三國時營壘也百里上何氏校作四
百里

艾以毡自裹推轉而下將士皆攀木緣崖魚貫而進先登至江
油

寰宇記卷八十四劔州陰平縣本漢梓潼縣有馬閣山在縣北六十里昔鄧艾伐蜀從景谷路出江油縣至此懸崖絕壁乃束馬懸車造作棧閣方得路通因名龍州江油縣石門山其山兩邊有石壁相對望之如門鄧艾伐蜀至此方輿紀要卷五十九青唐嶺在階州文縣東南胡氏曰由此入龍州爲左擔道凡一百五十里卽鄧艾入蜀之道又卷七十三龍安府千戶所白水江自陝西文縣流入境又東過劔州界至昭化縣入嘉陵江鄧艾伐蜀作浮橋於江上又卷五十九鄧艾伐蜀置秦隴閣道凡一十二處

並作舟船豫順流之事

何氏從宋本豫下增備字

艾父子既囚鍾會至成都先送艾然後作亂會已死艾本營將士追出艾檻車迎還瑾遣田續等討艾遇於縣竹西斬之子忠與艾俱死

晉書衛瑾傳鄧艾鍾會之伐蜀也瑾持節監艾會軍事行鎮西軍司給兵千人蜀既平艾輒承制封拜會陰還異志因艾專擅密與瑾俱奏其狀詔使檻車徵之會遣瑾先收艾會以瑾兵少欲令艾殺瑾因加艾罪瑾知欲危已然不可得而距乃夜至成都檄艾所統諸將稱詔收艾其餘一無所問若來赴官軍爵賞如先敢有不出誅及三族比至雞鳴悉來赴瑾唯艾帳內在焉平旦開門瑾乘使者車徑入至成都殿前艾臥未起父子俱被執艾諸將圖欲劫艾整伏趨瑾營瑾輕出

迎之僞作表章將申明艾事諸將信之而止又曰鄧艾本營將士復追破檻車出艾還向成都瑾自以與會共陷艾懼爲變又欲專誅會之功乃遣護軍田續至綿竹夜襲艾於三造亭斬艾及其子忠

三年議郎段灼上疏理艾曰

晉書段灼傳灼字休然敦煌人果直有才辯少仕州郡稍遷鄧艾鎮西司馬從艾破蜀有功封關內侯累遷議郎一清案鎮西當作征西

宜收尸喪還其田宅

寰宇記卷八十七遂州小溪縣鄧艾死葬此郡有祠存埋一魂而天下歸其義

何云埋宜作理上云其肯理之是也

九年詔曰艾有功勳受罪不逃刑而子孫爲民隸

民一本作萌

世語曰咸寧中積射將軍樊震爲西戎牙門

宋百官志有積射將軍而不言建置之由續志無之則是魏晉間置也

永嘉中朗爲新都太守未之官在襄陽失火朗及母妻子舉室燒死惟子韜子行得免千秋先卒二子亦燒死

何云閭門幾無炊火天之報艾者酷矣信乎爲將者道家所忌一清案艾以一朝而滅四百餘年之漢祚其得此酷報天道之昭彰也

宣王爲秦會使尙書鍾繇調泰

繇字何氏校改毓

會爲其母傳曰夫人張氏字昌蒲太原茲氏人太傅定陵成侯之命婦也世長吏二千石夫人少喪父母充成侯家脩身正行非禮不動爲上下所稱述貴妾孫氏攝嫡專家

會母庶也孫夫人也繇寵庶出嫡而更納賀氏乃以二母忿爭之故斥孫氏爲貴妾何妄誕耶繇素有明德而於倫理背繆如此傳所爲深山大澤必生龍蛇果由會謀叛赤族哀哉晉書禮志漢魏故事王公羣妾見於夫人夫人不荅拜嫡庶之分其嚴如此

會年五歲繇遺見濟濟甚異之曰非常人也

世說裴令公曰見鍾士季如觀武庫但覩矛戟

及壯有才數技藝而博學

書斷云會善書有父風美兼行草尤工隸書逸致飄然有凌雲之志韋續九品書鍾會八分在上下

昔范氏少子爲越簡子設伐邾之計

一本越作趙是也

汝居心正吾知勉矣

勉疑作免古亦通

初吳大將全琮孫權之婚親重臣也琮子惲孫靜從子端嗣綏等

端字當在惲字下吳志全夫人傳全惲全端全禕全儀等降

魏諸葛誕傳亦作全懌全端可證也下文懌兄子輝卽是全
禕晉書文帝紀亦作禕又吳志孫靜子姪無名嗣緝者晉紀
作孫彌孫曼二人皆靜次子瑜之子故以孫系祖若其從子
則彼祖父自有名字何緣稱靜也晉書爲得

艾趣甘松沓中連綴維緒趣武街橋頭

魏武徙武都郡於小槐里之後下辨地入於蜀謂之武街城
武街下辨縣治也

會統十餘萬眾分從斜谷駱谷入

晉書良吏傳鄧攸平陽襄陵人祖殷亮直彊正鍾會伐蜀奇
其才自黽池令召受主簿

儀者許褚之子有功王室猶不原貸諸軍間之莫不震竦

三國志卷二十八
斯時晉已有代魏之勢曹氏子孫且不足存何況其功臣苗裔耶會蓋借儀以立威耳

會徑過西出陽安口

陽安口卽陽平關亦曰陽安關水經沔水注謂之瀼口城以西帶瀼水故名

今鎮西奉辭銜命攝統戎重

文選重作車

益州先主以命世英才興兵朔野

文選朔作新

蜀相杜見禽於秦

杜當作莊文選作蜀侯

鄧艾追姜維到陰平簡選精銳欲從漢德陽入江油左脩道
漢德陽卽漢德陽亭也詳蜀志張裔傳方輿紀要卷七十三
龍安府江油縣漢爲陰平道蜀漢置江油戍左擔山在府東
百八十里鄧艾伐蜀路經江油因山高江險脩繫棧閣以通
擔負今七里閣是也胡氏曰自此南者右肩不得易所負謂
之左擔道

緒以本受節度邀姜維西行非本詔遂進軍前向白水與會合
後漢書郡國志廣漢郡白水

艾使章先發

發一本作登

臣輒遣司馬夏侯威護軍胡烈等徑從劔閣出新都大渡

後漢書郡國志廣漢郡新都方輿紀要卷六十六大渡河出
雅州西北生羌界一名沫水史記司馬相如除邊關益斥
西至沫若水此卽沫水也引水經注南安縣有濛水卽大渡
河通釋云大渡河一名羊山江羊一作陽流經嘉定州城東
南而入於大江

參軍爰彰將軍句安等躡其後

爰彰乃殄虜護軍爰邵之子邵艾傳注引荀綽冀州記云邵
少子倩

世語曰會善效人書於劒閣要艾章表白事皆易其言令辭指
悖傲多自矜伐又毀文王報書手作以疑之也

世說鍾會是荀濟北從舅二人情好不協苟有寶劒可直百

萬常在母鍾夫人許會善書學荀手跡作書與母取劍仍竊去不還荀勗知是鍾而無由得也思所以報之後鍾兄弟以千萬起一宅始成甚精麗未得移住荀極善畫乃潛往畫鍾門堂作太傅形象衣冠狀貌如平生二鍾入門便大感慟宅遂空虛

書版署置更使所親信代領諸軍所請羣官悉閉者益州諸曹屋中城門宮門皆閉嚴兵圍守

晉書衛瓘傳會悉請諸將胡烈等因執之囚益州解舍遂發兵反於是士卒思歸內外騷動人情憂懼會畱瓘謀議乃書板云欲殺胡烈等舉以示瓘瓘不許因相疑貳瓘如廁見胡烈故給使使宣語三軍言會反會逼瓘定議經宿不眠各橫

刀膝上在外諸將已潛欲攻會瑾既不出未敢先發會使瑾慰勞諸軍瑾心欲去且堅其意曰卿三軍主宜自行會曰卿監司且先行吾當後出瑾便下殿會悔追之使呼瑾瑾辭眩疾動詐仆地比出閤數十信追之瑾至外解服鹽湯大吐瑾素羸便以困篤會遣所親人及醫視之皆言不起會由是無所憚及暮門閉瑾作檄宣告諸軍諸軍並已唱議陵旦共攻會會率左右拒戰諸將擊之唯帳下數百人隨會繞殿而走盡殺之瑾於是部分諸將羣情肅然

會已作大坑白楮

楮與棒同

拜爲散騎以次楮殺坑中

騎一本作將通鑑坑上有內字

內人共舉機以柱門

機一本作机

遵安定人以身兼文武累居藩鎮至車騎將軍

晉書胡奮傳亦云魏車騎將軍陰密侯遵

清案三少帝紀

遵由征東大將軍遷會將軍甘露元年七月薨車騎豈贈官
邪時車騎將軍在衛將軍四征四鎮之上

太康中以奮爲尙書僕射加鎮軍大將軍開府

晉書奮傳性開朗有籌略卒贈車騎將軍諡曰壯

次烈字元武泰州刺史

泰一本作秦

會成都戰克

何云成都下當有王字

漢晉春秋曰文王聞鍾會功曹向雄之收葬會也

晉書向雄傳雄字伯茂河內山陽人父韶彭城太守雄仕郡
爲主簿太守劉毅嘗以非罪笞雄及胡奮代毅爲太守又以
少譴繫雄於獄司隸校尉鍾會於獄中辟雄爲都官從事會
死無人殯斂雄迎喪而葬之

於時吾下讎對枯骨

吾字一本作殿是也晉書作殿下

會嘗論易無互體才性同異及會死後於會家得書二十篇名
曰道論而實刑名家也其文似會

世說鍾會撰四本論始畢甚欲使嵇公一見置懷中既定畏其難懷不敢出於戶外遙擲便回急走注曰四本者言才性同才性異才性合才性離也尙書傳嘏論同中書令李豐論異侍郎鍾會論合屯騎校尉王廣論離隋經籍志周易盡神論一卷梁有周易無互體論三卷道德經注二卷芻蕘論五卷並鍾會撰又集九卷梁十卷錄一卷

初會弱冠與山陽王弼並知名弼好論儒道辭才逸辯注易及老子爲尙書郎年二十餘卒

世說何晏爲吏部尙書有位望時談客盈坐王弼未弱冠往見之晏問弼名因條向者勝理語弼曰此理僕以爲極可得復難不弼便作難一坐人便以爲屈於是弼自爲主客數番

皆一坐所不及又云何晏注老子未畢見王弼自說注老子
旨何意多所短不復得作聲但應諸諾遂不復注因作道德
論水經穀水注尸鄉春秋之尸氏也其澤野負原夾郭多墳
隴焉陸機初入洛次河南之偃師時忽結陰望道左若有民
居者因往逗宿見一少年姿神端遠與機言元機服其能而
無以酬折前至一辨文機題緯古今綜檢名實此少年不甚
欣解將曉去稅駕逆旅姬曰君何宿而來自東數十里無村
落止有山陽王家墓機乃怪悵還睇昨路空野昏霾雲攢蔽
日知所遇者審王弼也寰宇記卷五王弼墓在偃師縣南三
里隋經籍志王弼注周易六十四卦六卷易略列一卷論語
釋疑三卷老子道德經注二卷又集卷錄錄一卷

無子絕嗣

晉張湛列子序稱輔嗣女壻趙季子然則弼雖乏嗣亦有女矣

業字長緒位至謁者僕射子宏字正宗司隸校尉

晉書良吏傳王宏代劉毅爲司隸校尉免官後起爲尙書太
康五年卒贈太常

宿松羅忠濟初校

黟縣黃士陵覆校

陽湖吳翊寅再覆校

三國志注補卷二十八